



## **REFERAT OPĆINSKOG NAČELNIKA**

**POVODOM 17. NOVEMBRA – DANA OPĆINE ČELIĆ**

Dame i gospodo, uvaženi gosti, predstavlja mi zadovoljstvo da vas ovom prigodom u svoje i ime općine Čelić, poselamim i pozdravim.

Ovo je prilika da se posjetimo da je na današnji dan 1991. godine, cjelokupno stanovništvo ovoga kraja s pravom glasa izašlo na Referendum i izjasnilo se za izdvajanje današnje teritorije iz sastava SAO Semberija i Majevisa, a time i opštine Lopare, čime smo nastavili kontinuitet Općine, čiji je status bio prekinut 1962. godine. Pokazalo se da je to bila historijska Odluka za vrijedno i ponosno stanovništvo ovog kraja, svjesni činjenice šta znači imati status Općine. Dakle, građanima je vraćen institucionalni okvir za vlastiti napredak u cilju ostvarivanja boljih uslova za odrastanje, školovanje i bolju ukupnu budućnost ove Općine. Kasnije dolazi agresija na državu BiH, gdje do izražaja dolazi spremnost i pokazana hrabrost boraca i, sada je trenutak da se zahvalim svima onima koji su dali svoje živote za odbranu države BiH, porodicama šehida, ratnim vojnim invalidima i demobilisanim borcima, građanima općine Čelić. Naravno zahvaljujem se svima onima koji su pridonosili i pridonose tome da Općina postane održiva lokalna zajednica i mjesto boljeg, sretnijeg i ugodnijeg življenja za sve njene građane. Sve ove godine koračali smo na putu koji za nas nije nimalo bio lahak, ali sa jasnom spoznajom da će naša Općina biti onakva kakvu je sami izgradimo. Za sadašnjost i smjer kojim idemo u budućnost, građani su nam dali povjerenje i veliko breme koje moramo nositi i opravdati.

U proteklom periodu, pored redovnih aktivnosti, radili smo na realizaciji infrastrukturnih projekata i pored vrlo skromnih izvornih prihoda, realiziramo projekte u vrijednosti oko million konvertibilnih maraka.

Nedostajuća sredstva za realizaciju infrastrukturnih projekata obezbjeđujemo od viših nivoa vlasti, različitih fondacija, ambasada, agencija kao i kontinuirano učešće zajedno sa Općinama iz okruženja s ciljem regionalne saradnje u evropskim predpristupnim fondovima. Posebno ističem projekat IFAD-A i do sada realiziranog projekta poboljšanja sortimenta jagode na području Općine Čelić gdje je 45 poljoprivrednika dobilo elitni sadni material koji će zasigurno uticati da se u Čeliću proizvode veće količine i kvalitet jagoda.

Realizacijom projekta kanalizacije i vodosnadbjevanja, Općina Čelić od 2018 godine počinje sa otplatom kredita i pored toga kanimo nastaviti sa daljnom realizacijom na ovom projektu što činimo u ovom trenutku s ciljem produženja kolektora B a sve u cilju zaštite postojećeg izvorišta.

Također, i dalje ćemo nastaviti kako na izgradnji sekundarne kanalizacione mreže u svim našim mjesnim zajednicama tako i podizanja nivoa vode na brani u Vražićima čime ćemo obezbjediti da u postojećim vodosistemima građani Općine Čelić koriste sisteme i za navodnjavanje čime direktno utičemo na povećane prihode u poljoprivrednoj proizvodnji jer znamo da je voda važan odnosno najvažniji segment za kvalitetan rad i planirani prinos.

Što se tiče rada mjesnih zajednica, radit ćemo na obezbjeđenju prostora za kontinuiran i nesmetan rad organa mjesnih zajednica.

S obzirom da je Općina Čelić cijelom svojom dužinom uz dejtonsku liniju i imamo veliki broj izbjeglih, raseljenih osoba i povratnika, samim tim imamo brigu i obavezu da tim ljudim u skladu sa njihovim iskazanim potrebama radimo na realizaciji istih. Posebno ističem da smo u proteklom period radili na poboljšanju vodosnadbijevanja, saniranju puteva kao i drugih projekata koje ćemo kao i do sada, i u budućem periodu realizirati bez obzira na vjersku ili nacionalnu pripadnost bilo da se to odnosi na području Federacije ili nama susjednog entiteta. Nadam se da ćemo imati veći nivo saradnje sa Općinom Lopare bez obzira na njihovo stanje kako bi povratnicima i na području Općine Čelić i Lopare učinili život dostojanstvenijim.

Potpisan je Sporazum o saradnji, na sprovođenju državnog projekta zatvaranja kolektivnih centara i alternativnog smještaja pružanjem javnih stambenih rješenja za socijalno zbrinjavanje raseljenih osoba i socijalnih slučajeva. Ukupna vrijednost projekta je 976.115 EURA a aktivnosti se vode u skladu sa Sporazumom i u fazi je odabira projektanta za izgradnju stambene zgrade sa 18 stanova, dva poslovna prostora i pomoćnih prostorija za smještaj 60 korisnika.

Punu posvećenost i podršku dat ćemo projektima koji se tiču zapošljavanja, tako da ćemo kao i u ovoj godini i ubuduće finansirati sve ukupne administrativne troškove registracije svakog novoformiranog privrednog subjekta na području Općine Čelić. Tako ćemo maksimalno tražiti od naših javnih preduzeća i ustanova i ciljano planirati i podržavati sredstvima iz općinskog budžeta projekte koje podržavanju viši nivoi vlasti odnosno Kantonalni i Federalni zavod za zapošljavanje.

Što se tiče drugih povećavanja uposlenosti, mi na području naše općine u poslovnoj zoni u Brnjiku imamo kapacitet i investitore da u ovom trenutku uposlimo najmanje 200 radnika. I sistematski i planski ćemo ubuduće raditi na tome na način da obrazujemo ciljano nove profile u našoj srednjoj školi koji će nakon završetka imati odmah posao, stipendirati ih i sa zavodom za zapošljavanje I vlastitim sredstvima iz budžeta ili na neki treći način educirati buduće uposlenike svjesni činjenice da na području naše općine nemamo neko veliko i posebno iskustvo za rad u fabrici u zatvorenom prostoru i sa tačno određenim radnim vremenom.

Dragi prijatelji, poštovani vijećnici, dragi gosti, dame i gospodo svi zajedno moramo više i kvalitetnije raditi za državu Bosnu i Hercegovinu a posebno voditi računa o principu solidarnosti i ravnomjernom ekonomskom razvoju jer bez toga ćemo imati samo velike i razvijene gradove a sva manja mjesta će odumirati.

**Vama koji danas dobijate zahvalnice za doprinos u razvoju Općine Čelić, kantonalnom i federalnom nivou i nama koji obavljamo značajne dužnosti, želimo reći onu narodnu “UVIJEK MOŽE VIŠE- PODIGNIMO LJESTVICU”.**

**Poštovani sugrađani čestitam vam Dan općine i želim vam puno zdravlja, sreće i uspjeha u životu. Vama dragi gosti se zahvaljujem što ste svojim dolaskom uveličali ovu našu svečanost.**

**Hvala**

**Općinski načelnik**

**Sead Muminović**